



SLUŽBENI GLASNIK

OPĆINE BUŽIM

Godina XXIX - Broj 4	30. 07. 2024 BUŽIM	Izdanje na bosanskom jeziku
----------------------	-----------------------	--------------------------------

OPĆINSKO VIJEĆE

25.

Na osnovu člana 126. i člana 128. Zakona o prostornom uređenju i gradnji ("Službeni glasnik USK", broj: 12/13, 3/16, 15/20, 10/22, 23/23, 7/24, 13/14) i člana 24. stav 1. tačka 5. Statuta općine Bužim ("Službeni glasnik općine Bužim", broj:12/15), Općinsko vijeće općine Bužim, na VII (sedmoj) vanrednoj sjednici održanoj dana 20.07.2024. godine, na prijedlog Općinskog načelnika općine Bužim, **donosi :**

ODLUKU
o postupku, uslovima, načinu i troškovima

legalizacije bespravno izgrađenih građevina na području Općine Bužim

Član 1.

Ovom Odlukom utvrđuju se postupak, uslovi, način i troškovi legalizacije bespravno izgrađenih građevina na području Općine Bužim.

Član 2.

Građenje građevine bez pravosnažnog odobrenja za građenje nije dozvoljeno.

Građevine izgrađene bez odobrenja za građenje ne mogu se priključiti na uređaje i instalacije, komunalne i druge infrastrukture (vodovod, kanalizacija, elektrovod, toplovod, telekomunikacijski vodovi, javni put i dr.)

Izuzetno, stambeni objekti izgrađeni bez odobrenja za građenje mogu se uz pisanu saglasnost organa uprave nadležnog za izdavanje odobrenja za građenje, privremeno do pravosnažnog okončanja postupka legalizacije, priključiti na infrastrukturu (vodovod, elektrovod, telekomunikacijski vodovi) ukoliko je u toku postupak njihove legalizacije.

Vlasnici bespravno izgrađenih građevina nemaju pravo na naknadu u slučaju uklanjanja građevine na osnovu odluke ili rješenja nadležnog organa uprave.

Član 3.

Pod legalizacijom, u smislu ove Odluke, podrazumijeva se donošenje rješenja o naknadnoj urbanističkoj saglasnosti, donošenje naknadnog odobrenja za građenje i upotrebne dozvole, u skladu sa odredbama Zakona o prostornom uređenju i građenju („Službeni glasnik Unsko-sanskog kantona”, broj: 12/13, 3/16, 15/20, 10/22, 23/23, 7/24 i 13/24).

Pod legalizacijom građevinskog objekta se podrazumijeva građevina koja je izgrađena minimalno u fazi grubih građevinskih radova, uključujući i krov.

Član 4.

Građevinom, u smislu ove Odluke, smatra se građevinski objekat na određenoj lokaciji trajno povezan s tlom, a koji se sastoji od građevinskog sklopa i ugrađene opreme, koji u okviru tehnološkog procesa zajedno čine tehnološku cjelinu, kao i samostalno postrojenje trajno povezano sa tlom. Građevinom se smatraju i nasipi, iskopi i odlagališta, tj. svi objekti povezani sa tlom, kojima se mijenja izgled i način iskorištavanja prostora.

Bespravno izgrađenom građevinom, u smislu ove Odluke, smatra se građevina ili njen dio izgrađen bez odobrenja za građenje, građevina u čijoj je

izgradnji odstupljeno od odobrenja za građenje i građevina dograđena ili nadzidana bez odobrenja za građenje.

Izgrađenom građevinom, u smislu ove Odluke, smatra se građevina na kojoj su, do dana stupanja na snagu ove Odluke, izvedeni građevinski i instalaterski radovi u cjelini ili je završen dio građevine koji se može samostalno koristiti.

Građevinom u čijoj je izgradnji odstupljeno od odobrenja za građenje, u smislu ove Odluke, smatra se građevina čiji vlasnik posjeduje odobrenje za građenje, ali ne i izmjene i dopune odobrenja za građenje u skladu sa zakonskim odredbama. Građevinom dograđenom ili nadzidanom bez odobrenja za građenje, u smislu ove Odluke, smatra se građevina dograđena ili nadzidana bez odobrenja za građenje.

Član 5.

Postupak legalizacije bespravno izgrađenih građevina prema odredbama ove Odluke provodi Općinski načelnik putem Službe za prostorno uređene, geodetskih i imovinsko-pravnih poslova.

Član 6.

Postupak legalizacije bespravno izgrađene građevine pokreće se po zahtjevu ovlaštenog lica.

Ovlaštenim licem, u smislu ove Odluke, smatra se: - investitor bespravno izgrađene građevine,

- vlasnik bespravno izgrađene građevine, ukoliko on nije bio investitor,

- lice koje je bespravno izgrađenu građevinu steklo na drugi zakonom propisan način.

Član 7.

Zahtjev za naknadno donošenje rješenja o urbanističkoj saglasnosti, naknadno izdavanje odobrenja za građenje i odobrenja za upotrebu bespravno izgrađenih građevina, podnosi se Službe za prostorno uređene, geodetskih i imovinsko-pravnih poslova.

Član 8.

Rok za podnošenje zahtjev za donošenje rješenja o urbanističkoj saglasnosti za bespravno izgrađene građevine iz člana 3. ove Odluke može se podnijeti do 31.12.2024.godine.

Član 9.

Uz zahtjev za donošenje naknadnog rješenja o urbanističkoj saglasnosti prilaže se:

- kopija katastarskog plana, sa naznakom predmetne i susjednih parcela na kojoj se nalazi bespravno izgrađena građevina;

- geodetski snimak sa ucrtanim položajem objekta, urađena od ovlaštene organizacije za geodetske poslove ili od organa uprave za geodetske poslove;

- arhitektonsko-građevinski snimak izvedenog stanja bespravno izgrađene građevine (dva primjerka) u razmjeri 1:100 na nivou idejnog projekta, koji obuhvata : podatke o investitoru i ovlaštenom projektantu, tehnički opis sa korisnom površinom objekta, podatke o lokaciji bespravne građevine, situaciono rješenje sa dispozicijom, visinom, gabaritom, namjenom objekta i po potrebi osnovnim tehničko-tehnološkim obilježjima, presijeci, četiri fotografije u boji, fasade objekta;

- obrazloženje zahtjeva sa podacima o namjeni, veličini, načinu izgradnje, lokaciji i godini izgradnje bespravno izgrađene građevine,

-ovjerena izjava investitora bespravne građevine da prihvata eventualni rizik korištenja građevine.

Član 10.

Rješenje o naknadnoj urbanističkoj saglasnosti ne može se donijeti za bespravno izgrađene građevine koje su izgrađene:

1. suprotno namjeni određenoj odgovarajućim planskim dokumentom;

2. u zonama posebne namjene utvrđenim odgovarajućim prostorno-planskim dokumentom;

3. na rezervisanim površinama, koje su kao takve utvrđene odgovarajućim prostorno-planskim

dokumentom;

4. na zaštićenim područjima prirodnog i graditeljskog naslijeđa utvrđenim odgovarajućim prostorno-planskim dokumentom, zakonskim propisima i donesenim Odlukama nadležnih organa u toj oblasti;

5. u I ili II zaštitnoj zoni izvorišta vode za piće, osim ako je odgovarajućim prostorno-planskim dokumentom i Odlukom o zonama sanitarne zaštite izvorišta vode za piće drugačije utvrđeno;

6. u zonama saobraćajne i energetske infrastrukture, u zaštitnim pojasevima definisanim i utvrđenim odgovarajućim prostorno-planskim dokumentom i zakonskim propisima u tim oblastima;

7. u zonama vodne infrastrukture, u zaštitnim pojasevima definisanim i utvrđenim odgovarajućim prostorno-planskim dokumentom i zakonskim propisima u toj oblasti;

8. u zonama eksploatacije mineralnih sirovina (rudnog blaga) utvrđenim odgovarajućim prostorno-planskim dokumentom;

9. u zonama sporta, rekreacije i zaštitnog zelenila utvrđenim odgovarajućim prostorno-planskim dokumentom;

10. na komunalnim građevinama i uređajima;

11. u zonama klizišta, utvrđenim odgovarajućim prostorno - planskim i studijsko - analitičkim dokumentom;

Izuzetno stavu 1. tačka 1) može se donijeti Rješenje o naknadnoj urbanističkoj saglasnosti za bespravne građevine, koje su izgrađene van G.Z. ukoliko postoje minimalni obim uređenja zemljišta, koji podrazumjeva:

- Trajni kolski prilaz građevine sa javne saobraćajnice;

- Snabdjevanje vodom;

- Odvodnja otpadnih voda putem kanalizacionog sistema ili septičke jame;

- Snabdjevanja električnom energijom,

Član 11.

Građevine izgrađene bez odobrenja za građenje do 23.05.1974. godine se ne smatraju bespravno izgrađenim građevinama.

Za ove građevine se izdaje odgovarajuće uvjerenje, u skladu sa odredbama Zakona o upravnom postupku (Službene novine Federacije Bosne i Hercegovine», broj: 2/98 i 48/99), koje služi za regulisanje statusnih promjena i prava upisa u zemljišne knjige, dogradnje, rekonstrukcije ili priključka na komunalnu infrastrukturu.

Član 12.

Rješenje o naknadnoj urbanističkoj saglasnosti donijet će se za bespravno izgrađene građevine koje se nalaze na području obuhvata odgovarajućeg provedbenog prostorno-planskog dokumenta i svojim položajem (lokacijom), veličinom i namjenom zadovoljavaju urbanističko-tehničke i druge uslove tog dokumenta i odredbe Odluke o njegovom provođenju, propisane građevinske standarde i uslove utvrđene posebnim zakonom.

Član 13.

Važenje rješenja o izdavanju naknadne urbanističke saglasnosti je godinu dana od dana pravosnažnosti rješenja.

Važenje rješenja iz prednjeg stava ovoga člana može se produžiti za godinu dana, a početak roka se računa od dana pravosnažnosti rješenja.

Član 14.

U postupku donošenja naknadnog rješenja o urbanističkoj saglasnosti posebnim zakonima propisane saglasnosti pribavlja Služba za prostorno uređenje, geodetske i imovinsko-pravne poslove po službenoj dužnosti. Troškove pribavljanja saglasnosti iz prethodnog stava dužan je da plati podnositelj zahtjeva.

Član 15.

U postupku legalizacije, a prije naknadnog donošenja rješenja o odobrenju za građenje,

investitor, odnosno vlasnik bespravno izgrađene građevine je obavezan platiti naknade utvrđene posebnim zakonskim i podzakonskim propisima, između ostalog: naknadu za uređenje gradskog i ostalog građevinskog zemljišta u skladu sa odredbama Zakona o građevinskom zemljištu Federacije Bosne i Hercegovine („Službene novine Federacije Bosne i Hercegovine", broj: 25/03, 67/05) i Odlukom o građevinskom zemljištu („Službeni glasnik Općine Bužim" broj: 1/10); naknadu za trajnu pretvorbu poljoprivrednog zemljišta u građevinsko zemljište, ukoliko se bespravno izgrađena građevina nalazi na poljoprivrednom zemljištu, u skladu sa odredbama Zakona o poljoprivrednom zemljištu („Službene novine Federacije Bosne i Hercegovine", broj: 52/09);, naknadu za izgradnju skloništa u skladu sa odredbama Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine FBiH", broj : 39/03, 29/06 i 43/10), naknadu za dodijeljeno gradsko i ostalo građevinsko zemljište na korištenje, dio naknade koja se odnosi na naknadu plaćenu ranijim vlasnicima preuzetog zemljišta i dio naknade koja se odnosi na naknadu iz osnova prirodnih pogodnosti gradskog građevinskog zemljišta i pogodnosti već izgrađene komunalne infrastrukturu (renta), u skladu sa odredbama Zakona o građevinskom zemljištu Federacije Bosne i Hercegovine („Službene novine Federacije Bosne i Hercegovine", broj: 25/03, 67/05) i Odluke o građevinskom zemljištu („Službeni glasnik Općine Bužim" broj:1/10), posebnu naknadu za legalizaciju i druge naknade predviđene posebnim propisima.

Član 16.

Visina naknade za uređenje građevinskog zemljišta i rente određuje se rješenjem o urbanističkoj suglasnosti na osnovu podataka iz građevinskog snimka izvedenog stanja koji se prilaže uz zahtjev.

Član 17.

Zahtjev za naknadno donošenje rješenja o odobrenju za građenje za bespravno izgrađenu građevinu iz člana 3. ove Odluke podnosi lice na

čije ime glasi naknadno rješenje o urbanističkoj saglasnosti.

Član 18.

Uz zahtjev za naknadno donošenje rješenja o odobrenju za građenje prilaže se:

- pravosnažno rješenje o urbanističkoj saglasnosti;
- kopija katastarskog plana ;
- uvjerenje o cijepanju građevinske parcele, ukoliko nije provedeno u katastarskom operatu;
- dokaz o pravu građenja na predmetnoj parceli - izvod iz zemljišne knjige, ugovor na osnovu kojeg je investitor stekao pravo vlasništva ili odluka nadležnog organa na osnovu koje je investitor stekao pravo korištenja radi građenja, ugovor o partnerstvu sklopljen sa vlasnikom zemljišta i/ili nekretnine, ugovor o koncesiji kojom se stiče pravo građenja, pisana suglasnost vlasnika nekretnine dana pred notarom;
- dokaz o plaćenim, odnosno regulisanim naknadama;
- tri glavnog primjerka projekta izvedenog stanja koji sadrži:
 - a) tehnicki opis;
 - b) situacioni nacrt u razmjeri 1:200 do 1:1000 (građevinska parcela, predmetni objekat, okolni objekti, strane svjeta, saobraćajnice, trotoari, elektricne linije, vodovod i kanalizacija);
 - c) osnova temelja;
 - d) osnove svih etaža;
 - e) osnova krovista;
 - f) dva presjeka;
 - g) četiri karakteristicne fasade;
 - h) predmjer i predracun izvedenih radova.
- pisani izvještaj o reviziji projekta čija korisna površina prelazi za stambene objekte preko 300 m² i jednostavnih poljoprivrednih objekata

razvijene bruto površine do 400 m².

Član 19.

Ukoliko investitor, odnosno vlasnik bespravno izgrađene građevine, uz zahtjev za naknadno donošenje rješenja o odobrenju za građenje ne priloži potrebnu dokumentaciju i dokaz o plaćenim naknadama, Služba za prostorno uređenje, geodetske i imovinsko-pravne poslove će pozvati istog da u roku od 15 dana dopuni zahtjev. Ukoliko investitor, odnosno vlasnik bespravno izgrađene građevine ne dostavi traženo u ostavljenom roku, Služba za prostorno uređenje, geodetske i imovinsko-pravne poslove će odbiti zahtjev za naknadno donošenje rješenja o odobrenju za građenje.

Član 20.

Nakon ishodovanja rješenja o odobrenju za građenje, investitor na čije ime glasi to odobrenje podnosi zahtjev za naknadno donošenje rješenja o upotrebnoj dozvoli.

Član 21.

Uz zahtjev za naknadno donošenje rješenja o upotrebnoj dozvoli prilaže se:

- kopija pravosnažnog rješenja o odobrenju za građenje,
- geodetski elaborat snimka izvedenog stanja
- nalaz vještaka građevinske struke o izvedenim radovima i uslovima održavanja građevine;
- pisani izvještaj o izvršenom nadzoru nad građenjem,
- energetski certifikat
- dokaz o uplati naknade za podmirenje troškova za tehnički pregled,
- dokaz o uplati takse.

Ukoliko investitor, odnosno vlasnik bespravno izgrađene građevine nije u mogućnosti da, uz zahtjev za naknadno donošenje rješenja o upotrebnoj dozvoli, priloži dokumente iz alineje 3. i 4. stava 1. ovog člana, dužan je da priloži mišljenje

ovlaštene projektne organizacije da je projekat izvedenog stanja usklađen sa stanjem bespravno izgrađene građevine, da je građevina izgrađena u skladu sa tehničkim propisima i normativima, kao i uslovima za predmetnu građevinu utvrđenim posebnim propisima.

Član 22.

U postupku legalizacije, a prije naknadnog donošenja rješenja o odobrenju za građenje, investitor, odnosno vlasnik bespravno izgrađene građevine je obavezan da plati naknade utvrđene pozitivnim zakonskim propisima, odnosno važećim propisima u vrijeme podnošenja zahtjeva za legalizaciju.

Član 23.

Naknada za postupak legalizacije građevine zavisi od bespravne građevine koja je predmet legalizacije, i to: za stambeni objekat u iznosu od 250,00 KM, za stambeno – poslovni objekat iznos 500,00 KM i poslovni objekat u iznosu od 1.000,00 KM.

Član 24.

Obračun naknade za postupak legalizacije građevine utvrđuje se u postupku izdavanja naknadne urbanističke saglasnosti ili posebnim Zaključkom u postupku izdavanja naknadnog odobrenja za građenje, ako ista nije utvrđena u postupku urbanističke saglasnosti.

Član 25.

Naknade za postupak legalizacije građevina za objekte poslovne i stambeno-poslove namjene, oslobođena su lica iz člana 2. Zakona o dopunskim pravima branilaca i članova njihovih porodica («Službeni glasnik USK-a», br.3/05) i lica oslobođena po drugim pozitivnim zakonskim propisima. Naknade za postupak legalizacije građevine oslobođeni su investitori sakralnih (vjerskih) objekata i javnih objekata čiji su investitori mjesne zajednice i Općina Bužim.

Član 26.

U postupku legalizacije bespravno izgrađenih

građevina koji se vodi po osnovu odredaba ove Odluke, primjenjivat će se odredbe Zakona o upravnom postupku („Službene novine Federacije Bosne i Hercegovine“, broj: 2/98 i 48/99).

Član 27.

Za bespravno izgrađene građevine koje se legaliziraju u skladu sa odredbama ove Odluke, Služba za prostorno uređenje, geodetske i imovinsko-pravne poslove, će sačiniti evidencije:

- rješenja o urbanističkoj saglasnosti odnosno
- rješenja o odobrenju za građenje;
- rješenja o upotrebnoj dozvoli.

Član 28.

Ova odluka stupa na snagu danom donošenja i ista će biti objavljena u „Službenom glasniku općine Bužim“.

Broj: 01-02-2295/24

PREDSJEDAVAJUĆI

Bužim, 20.07.2024

OPĆINSKOG VIJEĆA

Hasan Hilić, s.r.

26.

Na osnovu člana 14. stav (4) Zakona o eksproprijaciji ("Službene novine Federacije BiH", broj: 70/07 i 36/10) i člana 24. stav (1) Statuta općine Bužim ("Službeni glasnik općine Bužim", broj: 12/15), na prijedlog Vlade USK, broj: 20-02-8950-1/2024 od 15.07.2024. godine za utvrđivanje javnog interesa za potpunu eksproprijaciju nekretnina za izgradnju objekta JU Dječiji vrtić Bužim, Općinsko vijeće općine Bužim na VII (sedmoj) vanrednoj sjednici, održanoj dana 20.07.2024. godine, **donijelo je:**

O D L U K U

o utvrđivanju javnog interesa za potpunu eksproprijaciju

1. Utvrđuje se da je od javnog interesa izgradnja objekta JU Dječiji vrtić Bužim, te da se radi izgradnje predmetnog objekta može izvršiti potpuna eksproprijacija sljedećih nekretnina:

- k.č. 79/1, livada 1. klase u površini 1754 m², zvana TUK, upisana u ZK ul. br. 654 K.O. Varoška Rijeka, suvlasništvo Nanić (Hasib) Hamdija, Nanić (Hasib) Hilmija, Nanić (Hasib) Zuhdija, Nanić (Mehmed) Ajka i Nanić (Mehmed) Vezira;

- Dio od k.č. 67, livada 1. klase u površini 1850 m², zvana HASIBOVA LUKA, upisana u ZK ul. br. 654 K.O. Varoška Rijeka, suvlasništvo Nanić (Hasib) Hamdija, Nanić (Hasib) Hilmija, Nanić (Hasib) Zuhdija, Nanić (Mehmed) Ajka i Nanić (Mehmed) Vezira;

- Dio od k.č. 193/10, ostalo neplodno zemljište u površini 864 m², Bužimnica, upisana u Zk. ul. br. 456 K.O. Varoška Rijeka, vlasništvo općina Bužim;

- Dio od k.č. 71/4, stambeno-poslovna zgrada i dvorište u površini 515 m², zvana Velika luka, upisana u ZK ul. br. 1048 K.O. Varoška Rijeka, suvlasništvo Duranović (Osman) Muvehida i Veladžić (Sead) Adis.

2. Utvrđuje se da je Vlada Unsko-sanskog kantona korisnik potpune eksproprijacije na nekretninama iz tačke 1. ove Odluke.

3. Protiv ove Odluke može se pokrenuti upravni spor u roku 30 dana od dana njenog stupanja na snagu.

4. Ova Odluka stupa na snagu danom donošenja i ista će se objaviti u Službenom glasniku općine Bužim.

Broj: 01-02-2424/24

PREDSJEDAVAJUĆI

Bužim, 20.07.2024

OPĆINSKOG VIJEĆA

Hasan Hilić, s.r.

27.

Na osnovu člana 7. stav 3. Zakona o finansiranju političkih stranaka ("Službeni glasnik Bosne i Hercegovine" br. 22/00), člana 38. Statuta Općine Bužim („Službeni glasnik Općine Bužim“, broj:12/15), na osnovu člana 19. stav 1. tačka b), Odluke o izvršavanju budžeta općine Bužim za 2024. godinu („Službeni glasnik općine Bužim“, broj: 1/24), Općinsko vijeće na VII (sedmoj) vanrednoj sjednici, održanoj dana 20.07.2024. godine, **donosi:**

O D L U K U

o raspodjeli i načinu utrošku sredstava na ekonomskom kodu 614323-Transfer za parlamentarne političke partije

Član 1.

Ovom Odlukom vrši se raspodjela i način utroška sredstava na ekonomskom kodu 614323-Transfer za parlamentarne političke partije u iznosu od 15.000,00 KM, planirana u budžetu općine Bužim za 2024. godinu u Službi Općinskog vijeća.

Član 2.

Raspodjela sredstava iz člana 1. ove Odluke, će se izvršiti na političkog subjekta koji participira u radu općinskog vijeća, a prema članu 7. stav 3. Zakona o finansiranju političkih stranaka ("Službeni glasnik Bosne i Hercegovine" br. 22/00).

Sredstva se doznavačavaju na žiro račune političkih stranaka, nezavisnih kandidata, koalicija i svakom vijećniku sa liste nezavisnih kandidata, te samostalnim vijećnicima srazmjerni dio imajući u vidu ukupna sredstva iz ove Odluke, a služit će za financiranje parlamentarnih grupa.

Ukoliko je ugovorom između članica koalicije, vijećnika sa liste nezavisnih kandidata ili samostalnih vijećnika regulisan način raspodjele novčanih sredstava koja pripadaju političkim strankama, koaliciji ili vijećnicima nezavisne liste kandidata sredstva iz ove Odluke pripadaju koaliciji ili vijećnicima nezavisne liste ili

samostalnim vijećnicima i doznačavaju se na osnovu odredbi toga ugovora.

Korisnik sredstava je dužan podnijeti zahtjev za isplatu sredstava definisanim ovom odlukom, u kojem će jasno biti naznačen korisnik sredstava i broj računa na koji se sredstva isplaćuju

Korisnici sredstava su dužni da do 31.12.2024. godine, općini Bužim dostave izvještaj o utrošku sredstava.

Raspodjela se vrši:

a) 30% sredstava dijeli jednako svim političkim strankama, odnosno koalicijama političkih stranaka koje su osvojile mandate, kako slijedi:

R.b	Politički subjekat	Broj vijećnika u OV	Iznos u KM
1.	Stranka demokratske akcije	7	750,00
2.	Narodni evropski savez NES	4	750,00
3.	Nezavisni blok	2	750,00
4.	Narodna lista Bužim	2	750,00
5.	Stranka penzionera/umirovljenika BiH	1	750,00
6.	SDP BiH	1	750,00
UKUPNO		17	4.500,00

b) 60% sredstava dijeli prema broju poslaničkih, odnosno delegatskih mandata, koje svaka politička stranka, koalicija političkih stranaka, odnosno nezavisni kandidat ima u trenutku dodjele mandata, kako slijedi:

R.b	Politički subjekat	Broj vijećnika u OV	Iznos u KM
1.	Stranka demokratske akcije	7	3.705,90

2.	Narodni evropski savez NES	4	2.117,64
3.	Nezavisni blok	2	1.058,82
4.	Narodna lista Bužim	2	1.058,82
5.	Stranka penzionera/umirovljenika BiH	1	529,41
6.	SDP BiH	1	529,41
UKUPNO		17	9.000,00

c) 10% od ukupnog iznosa raspoređuje parlamentarnim grupama srazmjerno broju poslaničkih, odnosno delegatskih mjesta koja pripadaju manje zastupljenom spolu, kako slijedi:

R.b	Politički subjekat	Broj vijećnika u OV (Ž)	Iznos u KM
1.	Stranka demokratske akcije	1	750,00
2.	Nezavisni blok	1	750,00
UKUPNO		2	1.500,00

Član 3.

O primjeni ove Odluke starat će se Općinski načelnik putem nadležnih službi.

Član 4.

Odluka stupa na snagu danom donošenja i ista će se objaviti u Službenom glasniku općine Bužim.

Broj: 01-11-1617/24

PREDSJEDAVALA

Bužim, 20.07.2024

OPĆINSKOG VIJEĆA

Hasan Hilić, s.r.

28.

Na osnovu 24. stav 1. tačka 7. i člana 109. Stav 2. Statuta Općine Bužim (Službeni glasnik Općine Bužim, broj 12/15), a na prijedlog Općinskog načelnika Općine Bužim, na svojoj VII (sedmoj) vanrednoj sjednici održanoj dana 20.07.2024. godine, Općinsko vijeće Općine Bužim, **donijelo je slijedeću:**

ODLUKU
o davanju saglasnosti za kupovinu
nekretnine

I

Ovom odlukom prihvata se procjena Komisije za procjenu prometne vrijednosti nekretnina Općine Bužim, prema Nalazu Komisije, br. 02-19-2011-1/21 od 29.11.2022. godine, za nekretninu označenu kao k.č. br. 766/2 „Brdo“ njiva 7. klase, površine 100 m², iz zk ul. br. 114, K.O. Bag, suposjed i suvlasništvo lica Kauković Sejada i Kauković Suvada iz Bužima, u ukupnom iznosu od 2.000,00 KM, odnosno 20,00 KM/m².

II

Daje se saglasnost Općinskom načelniku da u skladu sa ovom Odlukom u ime Općine Bužim zaključi i potpiše notarski obrađen ugovor, sa suvlasnicima nekretnina Kauković Suvadom i Kauković Sejadom iz Bužima, ili njihovim punomoćnicima, uz predhodno pribavljeno mišljenje Općinskog pravobranilaštva općine Bužim o nacrtu ugovora.

III

Ova Odluka stupa na snagu danom donošenja i objavit će se u Službenom glasniku Općine Bužim.

Broj: 01-19-2011/21 PREDSJEDAVALJUĆI

Bužim, 20.07.2024 OPĆINSKOG VIJEĆA

Hasan Hilić, s.r.

29.

Na osnovu 24. stav 1. tačka 7. i člana 109. Stav 2. Statuta Općine Bužim (Službeni glasnik Općine Bužim, broj 12/15), a na prijedlog Općinskog načelnika Općine Bužim, na VII (sedmoj) vanrednoj sjednici održanoj dana 20.07.2024. godine, Općinsko vijeće Općine Bužim, **donijelo je slijedeću**

ODLUKU
o davanju saglasnosti za kupovinu
nekretnina

I

Ovom odlukom prihvata se procjena Komisije za procjenu prometne vrijednosti nekretnina, prema Nalazu Komisije, br. 02-27-1618-1/22 od 28.03.2023. godine, za nekretnine označene kao k.č. br. 824/2, k.č. br. 905/2, k.č. br. 905/4, k.č. br. 905/5 i k.č. br. 905/7, sve K.O. Varoška Rijeka, suposjed i suvlasništvo lica Šahinović Seada, Šahinović Huseina, Šahinović Arifa i Alukić Fadile, u ukupnom iznosu od 6.125,00 KM.

Ukupna površina navedenih nekretnina (zauzeta proširenjem korita rijeke Bužimnice) iznosi 245 m², koja pomnožena za iznosom od 25,00 KM/2, koju procjenu je dala Komisija iz stava 1. odluke, čini ukupan iznos od 6.125,00 KM.

II

Daje se saglasnost Općinskom načelniku da u skladu sa ovom Odlukom u ime Općine Bužim zaključi i potpiše notarski obrađen ugovor, sa suvlasnicima nekretnina Šahinović Seadom, Šahinović Arifom, Šahinović Huseinom i Alukić Fadilom, ili njihovim punomoćnicima uz predhodno pribavljeno mišljenje Općinskog pravobranilaštva općine Bužim o nacrtu ugovora.

III

Ova Odluka stupa na snagu danom donošenja i objavit će se u Službenom glasniku Općine Bužim.

Broj: 01-11-1618/22 PREDSEDavajući
Bužim, 20.07.2024 OPĆINSKOG VIJEĆA

Hasan Hilić, s.r.

30.

Na osnovu člana 24. Statuta Općine Bužim (Službeni glasnik Općine Bužim, broj:12/15) člana 51., 116., 118., stav 3. Poslovnika o radu Općinskog vijeća općine Bužim (Službeni glasnik Općine Bužim, broj:3/16) Općinsko vijeće općine Bužim na prijedlog Općinskog načelnika općine Bužim, na VII (sedmoj) vanrednoj sjednici Općinskog vijeća održanoj dana 20.07.2024. godine, **usvojilo je:**

ZAKLJUČAK
o davanju saglasnosti Općinskom načelniku

I

Daje se saglasnost kojom se ovlašćuje Općinski načelnik općine Bužim da ovlasti advokate Hasić Sanila i Šabić Amela da zastupaju Općinu Bužim u pravnoj stvari izvršenja broj: 18 O Rs 049578 23 I.

II

Zaključak stupa na snagu danom donošenja i isti će se objaviti u Službenom glasniku općine Bužim.

Broj: 01-04-2121-3/24 PREDSEDavajući
Bužim, 20.07.2024 OPĆINSKOG VIJEĆA

Hasan Hilić, s.r.

OPĆINSKI NAČELNIK

31.

Na osnovu člana 123. Statuta Općine Bužim (Službeni glasnik Općine Bužim, broj:12/15) člana 19. Odluke o izvršavanju budžeta općine Bužim za 2024. godinu („Službeni glasnik općine Bužim“,

broj: 1/24), člana 2. stav (2) tačka a) Pravilnika o kriterijima, načinu i postupku raspodjele sredstava iz granta transfer udruženjima građana-ostali grantovi ekonomski kod 614324 koji se finansiraju ili sufinansiraju sredstvima budžeta Općine Bužim za 2024 , broj:02-11-1852/2024, Općinski načelnik **donosi :**

O D L U K U

o raspodjeli i načinu utroška sredstava na ekonomskom kodu 614324-transfer udruženjima građana-ostali grantovi iz budžeta Općine Bužim za 2024 godinu

Član 1.

U Odluci o budžetu općine Bužim za 2024 godinu („Službeni glasnik općine Bužim“, broj: 1/24) u Službi za opću upravu i društvene djelatnosti planirana su sredstva na ekonomskom kodu-614324- transfer udruženjima građana-ostali grantovi u iznosu od 50.000,00 KM i ista će se rasporediti na način:

1. Iznos od 45.000,00 KM raspoređuje se:

- a) BZK Preporod Bužim 3.000,00 KM
- b) Udruženje penzionera 5.000,00 KM
- c) Medžlis IZ Bužim 4.000,00 KM
- d) Udruženje žena NUR 1.000,00 KM
- e) UŽ Izvor 2.000,00 KM
- f) Futsal klub Konjodor 3.000,00 KM
- g) Futsal klub Bužim 1.000,00 KM
- h) Udruženje Otpisanih 2.000,00 KM
- i) Udruženje lovačko društvo Lovac 6.000,00 KM
- j) KBS Fadil Bajrektarević Gazija 1.500,00 KM
- k) MNK Vrhovska 5.000,00 KM
- l) Crveni križ 5.500,00 KM
- m) SSK Omladinac 3.000,00 KM
- n) PD Radoč 1.500,00 KM

o) Ribolovno društvo Šaran 1.500,00 KM

2) Iznos od 5.000,00 KM rasporedit će se putem Javnog poziva na osnovu Pravilnika o kriterijima, načinu i postupku raspodjele budžetskih sredstava kojeg će donijeti Općinski načelnik.

Sredstva iz člana 1. stav (1) tačke 1) ove Odluke raspoređivat će Općinski načelnik putem nadležne službe na osnovu zahtjeva ,programa.

Član 2.

O primjeni ove Odluke starat će se Općinski načelnik putem nadležnih službi.

Član 3.

Odluka stupa na snagu danom donošenja i ista će se objaviti u Službenom glasniku općine Bužim.

Broj: 02-11-1853/24 OPĆINSKI NAČELNIK

Bužim, 08.07.2024 Mersudin Nanić
dipl.ing.inf., s.r.

32.

Na osnovu člana 15. Zakona o principima lokalne samouprave u Federaciji Bosne i Hercegovine (Službene novine Federacije, broj:49/06 i 51/09) člana 38. stav 1. tačka 2. i člana 123. Statuta općine Bužim („Službeni glasnik općine Bužim“ , broj : 12/15.) člana 19. Odluke o izvršavanju budžeta općine Bužim za 2024 .godinu („Službeni glasnik općine Bužim“ broj:1/24) , Općinski načelnik općine Bužim, **donosi:**

PRAVILNIK

o kriterijima, načinu i postupku raspodjele sredstava iz granta transfer udruženjima građana-ostali grantovi ekonomski kod 614324 koji se finansiraju ili sufinansiraju sredstvima budžeta Općine Bužim za 2024

POGLAVLJE I - OPĆE ODREDBE

Član 1.

(Predmet pravilnika)

Ovim pravilnikom utvrđuju se kriteriji, način i postupak raspodjele budžetskih sredstava općine Bužim iz granta transfer udruženjima građana-ostali grantovi ekonomski kod 614324 u iznosu od 50.000,00 KM za 2024.

Član 2.

(Aplikanti)

(1) Sredstva iz člana 1.ovog pravilnika se dodjeljuju udruženjima građana, fondacijama i drugim nevladinim organizacijama (u daljem tekstu: aplikanti) koji su registrirani u BiH u skladu sa zakonskim propisima i imaju sjedište na području općine Bužim, a čiji projekti su kandidirani za finansiranje iz Budžeta općine Bužim i provode se u interesu i na području općine Bužim.

(2) Sredstva će se dodjeljivati putem :

a) Odluke Općinskog načelnika o raspodjeli i načinu utroška sredstava bez javnog poziva kojom će se definisati način dodjele, svrha dodjele sredstava, ukupan iznos sredstava koja se dodjeljuju, modalitet za doznačavanje sredstava, modalitet za praćenje i ocjenjivanje, te namjensko trošenje, izvještavanje i način praćenja dodjeljenih sredstava,

b) Javnog poziva za dodjelu budžetskih sredstava.

(3) U cilju ostvarivanja javnog interesa općine i njenih građana uslovi za finansiranje projekta sredstvima budžeta (grantovi budžeta) su :

a) Da je projekat namjenjen građanima općine Bužim

b) Da se projekat odnosi na slijedeće oblasti:

(ekologija, ljudska prava i prava djeteta, jačanje demokratije, a naročito projekti koji podstiču veće učešće mladih i žena u društvenom životu, projekti za širu lokalnu zajednicu iz oblasti socijalne sigurnosti i zdravstvene zaštite, kao što je pomoć starim i penzionerima, bolesnim i hendikepiranim osobama, djeci s posebnim potrebama)

POGLAVLJE II- JAVNI POZIV

Član 3.

(Javni poziv)

(1) Sredstva koja se dodjeljuju na osnovu Javnog poziva objavljuje Općinski načelnik na prijedlog službe za opću upravu i društvene djelatnosti.

(2) Javni poziv se objavljuje na službenoj Web stranici Općine Bužim i na oglasnoj ploči Jedininstvenog općinskog organa uprave općine Bužim.

(3) Javni poziv za raspodjelu sredstava traje 15 dana od dana objavljivanja na službenoj internet stranici organa.

Član 4.

(Komisija za odabir projekata)

(1) Postupak vrednovanja i odabira projekata provodi Komisija za vrednovanje i odabir projekata koju rješenjem imenuje Općinski načelnik.

(2) Komisija ima predsjednika i četiri člana .

POGLAVLJE III- PRIJAVA NA JAVNI POZIV**Član 5.**

(1) Subjekti (aplikanti) iz člana 2. ovog Pravilnika podnose Prijavu na objavljeni javni poziv Komisiji za vrednovanje i odabir projekata (u daljem tekstu: Komisija).

(2) Prijava treba sadržavati:

- a) Popunjen prijavni obrazac,
- b) Rješenje o registraciji (ovjerena kopija) ,
- c) Identifikacijski broj aplikanta (ovjerena kopija)
- d) Ugovor sa bankom s navedenim transakcijskim računom (ovjerena kopija)
- e) Projekat , koji treba da sadrži
 - naziv projekta
 - naziv organizacije (adresa, telefon/ fax i email)

- oblast na koju se odnosi projekat i opis konkretnog problema koji se rješava realizacijom projekta,

- ciljevi projekta (na koji način projekat doprinosi rješavanju problema)

- ciljna grupa

- detaljan opis projekta (po mogućnosti navesti sve projektne aktivnosti i vremensku dinamiku realizacije projekta)

- detaljan budžet projekta

Član 6.

Po javnom pozivu za realizaciju projekta može se prijaviti najviše jedan projekat po aplikantu. Po jednom projektu maksimalno odobrena sredstva iz budžeta općine Bužim su 1.000,00 KM. Subjekti iz člana 2. ovog pravilnika kojima su sredstva dodjeljena Odlukom Općinskog načelnika o raspdjeli i načinu utroška sredstava bez javnog poziva neće se dodjeliti sredstva putem javnog poziva.

Član 7.

(Obrazac za aplikaciju)

(1) Prijava sa potrebnom dokumentacijom se dostavlja na obrascu, koji je sastavni dio ovog pravilnika i isti sadrži:

- a) naziv projekta
- b) podaci o aplikantu
- c) status, datum, broj i mjesto registracije
- d) adresa aplikanta (ulica, mjesto, telefon)
- e) identifikacioni broj aplikanta
- f) transakcijski račun aplikanta
- g) ime i prezime osobe odgovorne za sprovođenje projekta
- h) kratak opis aplikanta (realizirani projekti, partneri, broj volontera, zaposlenih itd.)

i) sredstva potrebna za realizaciju projekta ili dijela koji se aplicira i informacija da li je aplikant za dio sredstava aplicirao kod drugog sufinansijera,

j) potpis lica koje je popunilo obrazac i pečat aplikanta

(2) Prijavni obrazac sa propisanom sadržinom se može preuzeti na Info-pultu Centra za pružanje usluga građanima.

POGLAVLJE IV- KRITERIJI ZA RASPODJELU SREDSTAVA

Član 8.

(1) Kriteriji za vrednovanje i odabir projekata:

a) Pozitivni kriteriji:

1) Vezanost projekta za oblast navedenu u članu 2. ovog Pravilnika.

2) Da se projekat odnosi na građane općine Bužim i da će se realizirati na području općine Bužim

3) Izražena potreba stanovništva za projektom

4) Jasna definicija ciljne grupe (kome je namjenjen)

5) Projekat je od uticaja na realizaciju drugih projekata u općini

6) Učešće predlagača projekta vlastitim ili donatorskim sredstvima

7) Održivost projekta

b) Eliminatorski kriteriji :

a) Nedostaju formalni uslovi za kandidovanje projekta (nepotpuna ,netačna i neblagovremena dokumentacija)

b)Projekat nije vezan za oblast navedenu u članu 3.

c) Tema projekta nije podudarna sa ciljevima i zadacima, odnosno registrovanom djelatnošću predlagača projekta

Član 9.

(Ocjena projekta)

(1) Po isteku roka za prijavu projekata Komisija otvara , pregleda i vrednuje prispjele projekte

(2) Neblagovremene projekte komisija neće otvarati niti razmatrati

(3) Za ocjenu projekta prema kriterijima koristi se skala od 1 do 5 za svaki od kriterija.

(4) Svaki član komisije dodjeljuje bodove za svaki od kriterija pojedinačno. Konačna ocjena bodova predstavlja zbir bodova svih članova Komisije.

(5) Ukoliko se članovi ne usaglase oko nekog od eliminatorskih kriterija, konačna odluka se odnosi na osnovi većine glasova svih članova Komisije.

(6) Komisija konačnu ocjenu svakog projekta vrši na obrascu koji je sastavni dio ovog pravilnika.

(7) U slučaju da dva ili više projekata imaju isti broj bodova, sredstva će se dodijeliti projektu za kojeg većinom članova komisija ocijeni uspješnijim.

Član 10.

(Odluka o dodjeli sredstava)

(1) Komisija sačinjava prijedlog Odluke o dodjeli sredstava rukovodeći se ocjenom projekta na osnovu kriterija propisanih članom 8. ovog pravilnika

(2) Komisija je dužna pripremiti prijedlog odluke o dodjeli sredstava i dostaviti Općinskom načelniku u roku od 15 dana od dana isteka roka javnog poziva za prijavu projekata.

(3) Odluku o dodjeli sredstava iz stava (2) ovog člana donosi Općinski načelnik i ista će se objaviti na službenoj internet stranici i oglasnoj tabli Općinskog organa i dostaviti je u pisanom obliku svakom aplikantu pojedinačno.

(4) Aplikantima čije prijave nisu prihvaćene za finansiranje o razlozima odbijanja prijave uz navođenje ostvarenog broja bodova po pojedinim kategorijama ocjenjivanja i obrazloženja iz opisnog dijela ocjene prijave obavijestit će Općinski načelnik putem nadležne službe.

(5) Aplikantima kojima nisu odobrena sredstva može se na njihov zahtjev, omogućiti uvid u zbirnu ocjenu njihove prijave.

(6) Aplikantima po javnom pozivu dopušta se izjavljivanje prigovora/žalbe Komisiji za žalbe u drugom stepenu.

(7) Prigovor u pravilu ne odgađa izvršenje odluke i nastavak provođenja postupka dodjele.

POGLAVLJE V- UGOVOR SA APLIKANTIMA

Član 11.

(Ugovori za odabrane projekte)

(1) Nakon donošenja odluke o dodjeli sredstava Općinski načelnik zaključuje ugovor sa subjektima kojima su sredstva dodjeljena odlukom iz člana 10. ovog pravilnika, koji sadrži prava, obaveze, odgovornosti, način praćenja, provođenja odobrenog projekta, način praćenja namjenskog trošenja sredstava, te elemente narativnog i finansijskog izvještavanja o provođenju projekta.

(2) Sredstva će biti doznačena nakon potpisivanja ugovora jednokratno ili u ratama, u skladu sa prilivom budžetskih sredstava općine Bužim.

(3) Nacrt Ugovora priprema nadležna služba, a isti minimalno sadrži sljedeće elemente:

a) osnovne informacije o davaocu budžetskih sredstava koja dodjeljuje sredstva i primaocu-korisniku sredstava,

b) svrhu dodjele sredstava odnosno za šta se dodjeljuju sredstva,

c) ukupan iznos sredstava koja se dodjeljuju,

d) vrijeme i mjesto provođenja programa ili projekta,

e) dinamiku i modalitete za doznačavanje sredstava,

f) modalitete za praćenje i ocjenjivanje, te namjensko trošenje dodjeljenih sredstava, uključujući:

- obaveznu dokumentaciju koju treba voditi primalac/korisnik sredstava, a kojom dokazuje namjensko trošenje doznačenih sredstava,

- izvještaj o aktivnostima i finansijsko izvještavanje, te rokove predaje izvještaja,

- terenske posjete,

- uvid u finansijsko poslovanje i druge administrativne i projektne obaveze primaoca korisnika sredstava,

g) uslove i način promjene odredbi ugovora,

h) uslove raskida ugovora (osiguranje povrata sredstava u slučaju nenamjensko utrošenih sredstava)

i) način rješavanja sporova.

Član 12.

(Izvještaji)

(1) Aplikanti kojima su dodjeljena budžetska sredstva za projekat podnose narativni i finansijski izvještaj o provođenju Općinskom načelniku, najkasnije 30 dana nakon provođenja projekta, a najkasnije do kraja kalendarske godine.

(2) Ukoliko se doznačena sredstva ne realiziraju do kraja kalendarske godine, aplikanti su dužni vratiti sredstva općini Bužim.

Član 13.

(Praćenje zaključenih ugovora)

Realizaciju zaključenih ugovora za odobrene projekte prati nadležna služba- Služba za opću upravu i društvene djelatnosti kao i kontrolu utroška sredstava.

POGLAVLJE VI- ZAVRŠNE ODREDBE

Član 14.

(Stupanje na snagu)

Ovaj pravilnik stupa na snagu danom donošenja, a isti će se objaviti u Službenom glasniku općine Bužim

Broj: 02-11-1852/24 OPĆINSKI NAČELNIK

Bužim, 05.07.2024 Mersudin Nanić
dipl.ing.inf., s.r.

33.

Na osnovu člana člana 29. stav 1. tačka 7. Zakona o zaštiti i spašavanju ljudi i materijalnih dobara od prirodnih i drugih nesreća (Službene novine F BiH broj: 39/03, 22/06 i 43/10), člana 32. Pravilnika o načinu rada i funkcionisanja štabova i povjerenika civilne zaštite (Službene novine F BiH broj: 77/06 5/07) a u vezi Odluke o proglašavanju stanja prirodne nesreće na području općine Bužim broj: 02-40-1965/24 od 24.06.2024. godine, na prijedlog Općinskog štaba civilne zaštite na svojoj 24. redovnoj sjednici održanoj dana, 17.07.2024. godine, Općinski načelnik općine Bužim, **donosi:**

O D L U K U

o proglašavanju prestanka stanja prirodne nesreće na području općine Bužim

Član 1.

Ovom Odlukom ukida se se stanje prirodne nepogode i stavlja van snage Odluka o proglašavanju stanja prirodne nesreće od poplava na području općine Bužim broj: 02-40-1965/24 od 24.06.2024. godine.

Član 2.

Obavezuje se Općinska komisija za procjenu šteta da u roku od 45. dana od dana donošenja ove Odluke izvrši sve aktivnosti na procjeni šteta nastalih od poplava na području općine Bužim.

Član 3.

Odluka stupa na snagu danom donošenja a ista će se objaviti u Službenom glasniku općine Bužim.

Broj: 02-40-2375/24 OPĆINSKI NAČELNIK

Bužim, 17.07.2024 Mersudin Nanić
dipl.ing.inf., s.r.

34.

Na osnovu člana člana 29. stav 1. tačka 7. Zakona o zaštiti i spašavanju ljudi i materijalnih dobara od prirodnih i drugih nesreća (Službene novine F BiH broj: 39/03, 22/06 i 43/10), člana 32. Pravilnika o načinu rada i funkcionisanja štabova i povjerenika civilne zaštite (Službene novine F BiH broj: 77/06 5/07) a u vezi Odluke o proglašavanju stanja prirodne nesreće na području općine Bužim broj: 02-40-1965/24 od 24.06.2024. godine, na prijedlog Općinskog štaba civilne zaštite na svojoj 24. redovnoj sjednici održanoj dana, 17.07.2024. godine, Općinski Štab civilne zaštite, **donosi:**

O D L U K U

o stavljanju van snage Naredbe o aktiviranju Službe za čistoću

Član 1.

Ovom Odlukom stavlja se van snage Naredba o aktiviranju Službe za čistoću broj: 02-40-2131/24 od 28.06.2024. godine.

Služba za čistoću prestaje sa svojim aktivnostima zaključno sa 17.07.2024. godine

Član 2.

Odluka stupa na snagu danom donošenja a ista će se objaviti u Službenom glasniku općine Bužim.

Broj: 02-40-2374/24 OPĆINSKI NAČELNIK

Bužim, 17.07.2024 Mersudin Nanić
dipl.ing.inf., s.r.

S A D R Ž A J

OPĆINSKO VIJEĆE

25. ODLUKA o postupku, uslovima, načinu i troškovima legalizacije bespravno izgrađenih građevina na području Općine Bužim 1
26. ODLUKA o utvrđivanju javnog interesa za potpunu eksproprijaciju, broj: 01-02-2424/24 6
27. ODLUKA o raspodjeli i načinu utrošku sredstava na ekonomskom kodu 614323-Transfer za parlamentarne političke partije 7
28. ODLUKA o davanju saglasnosti za kupovinu nekretnine, broj: 01-19-2011/21 9
29. ODLUKA o davanju saglasnosti za kupovinu nekretnina, broj : 01-11-1618/22 9
30. ZAKLJUČAK o davanju saglasnosti Općinskom načelniku, broj: 01-04-2121-3/24.....10

OPĆINSKI NAČELNIK

31. ODLUKA o raspodjeli i načinu utroška sredstava na ekonomskom kodu 614324-transfer udruženjima građana-ostali grantovi iz budžeta Općine Bužim za 2024 godinu.....10
32. PRAVILNIK o kriterijima, načinu i postupku raspodjele sredstava iz granta transfer udruženjima građana-ostali grantovi ekonomski kod 614324 koji se finansiraju ili sufinansiraju sredstvima budžeta Općine Bužim za 2024.....11
33. ODLUKA o proglašavanju prestanka stanja prirodne nesreće na području općine Bužim15
34. ODLUKA o stavljanju van snage Naredbe o aktiviranju Službe za čistoću.....15